

**TRIBUNA POLITICA**

# Segirezza e turissem criminal en il Grischun

DA CHRISTIAN RATHGEB,  
CUSSEGLIER GUVERNATIV

Differents eveniments e malfatgs en il chantun Grischun ch'èn vegnids commess da turists criminals han inquietà la populaziun ils ultims onns. Dapi l'aboliziun da las controllas da cunfin pervia da la participaziun da la Svizra a la cunvegna da Schengen ils 12 da december 2008 è il turissem criminal resp. èn ils delicts en il chantun Grischun s'augmentads per propi. Sch'ins resguarda detagliadamain la frequenza dals singuls malfatgs pon ins constatar tar ils malfatgs da facultad che l'enguladitsch general, l'enguladitsch da vehichels sco er l'enguladitsch cun infracziun cumpiglia la gronda part. Quai cumprovan las cifras las pli novas da la statistica criminala da la polizia 2012 ch'è vegnida fatga da l'Uffizi federal da statistica.

Il cumbat cunter il turissem criminal è ina incumbensa pretensiusa e difficila per la polizia chantunala. Las basas giuridicas ch'existan en il chantun Grischun dattan bain a la polizia chantunala las auto-



risaziuns ed ils meds finansials necessaris per pudair agir effectivamain cunter il turissem criminal. Ma la polizia chantunala quinta che la criminalitad d'infracziun vegnia a s'augmentar anc pli fitg ils proxims onns.

Er la populaziun vegn sensibilisada ed integrada en las investigaziuns che han lieu en il rom da las prescripziuns legalas, tut tenor la situaziun er cun agid da perditgas. Sch'i vegnan publitgads maletgs da delinquents enconuschents u nunenconuschents (investigaziun da publicitad) ston vegnir observads ils principis da la protecziun da la personalitad e da la commensuralitad e quai duai vegnir

accordà cun la procura publica.

Pervia dals eveniments ha la polizia chantunala organisà ed organischa differentas acziuns spezialas, tranter auter er cun ils partenaris dal sector da segirezza, per exempel cun la polizia chantunala dal Tessin u cun il corp da guardias da cunfin. Cun l'acziun «Tredici» èn vegnidas realisadas durant l'onn current differentas acziuns prioritarias per lung da l'axa nord-sid, e quai sin fundament da la situaziun actuala. Questas acziuns cuntinuan ussa durant ils proxims mais cun l'acziun «Tredici-bis».

Tenor ils cumandants da polizia fissi necessari da crear ina gruppa flexibla che pudess entrar en acziun tar ils puncts centrals effectivs e che duess gidar a cumbatter la criminalitad. Il departament da giustizia, segirezza e sanadad tegna en egl quest svilup ed examinescha actualmain il basegn d'ulteriuras forzas d'acziun resp. d'ina gruppa mobila per pudair megliar ulterioramain la situaziun da segirezza en il Grischun.